

ներայնոց. զի դիւրաւ և շուտով կատարիցի, և մի լինիցի ձեզ այնքան ձանձրութիւն: Իսկ և պատճառն թէ վասն էր խնդրէ փութով լինիլ, այս է՝ զի սրբազան Պապն, որոյ յատուկ գիտութեամբն և հրամանաւն եղև տպագրութիւն ճառիցս այսոցիկ, ստէպ հարցանէ այսմիկ հախորդի, արդեօք աւարտեալ իցէ: Գարձեալ Գերյարգելի Աբբայ Հօրն մեծաւ յարգութեամբ և շնորհակալութեամբ ողջոյն մատուցանեմ: Եւ յանձն արարեալ զիս աղօթից ձերոց սրբազանից, մնամ

Վերապատուութեան քում

Պատրաստական յամենայնի

հուաստ ծառայ

Ստեփաննոս Վարդապետ

Ի Հոսմ
Յամի տեառն 1756
մայիսի 22

ՃՂԳ.

Բ

Վերա. և գերյարգոյ Տեառն Տեառն Ստեփաննոսի Աստուածաբանաբան
վարդապետի Խնդալ ի տեր

ԶՎեհալուստրի գիրն, և ընդ նմին զըղձալի թուղթն Վերապատուութեանդ ընկալեալ, ծանեաք զգրեալսն. և յանձն առաք զյարգելի կամս նորա կատարել: Արդ՝ ոմանք ի վերապատուելի հարց մերոց, որք այսպիսի գործոյ կարողք են, ձեռնարկին յօժարութեամբ զգործս զայս առնել. վասն զի ի քաղաքի աստ արտաքոյ մենարանիս մերոյ ի հայս ոչ գոյր ոք որ կարող իցէր զայսպիսի գործս առնել: Բայց քանզի իտալական լեզուն ոչ այնչափ յստակ ձեւացուցանէ զհայկական գրաբառ լեզուն, վասն այսորիկ ի լատին բարբառ կամեցաք թարգմանել, թուելով մեզ նոյնչափ հաճոյ լինիլ Վեհալուստր Վսեմութեանն՝ լատինականն՝ որչափ իտալականն. թէպէտ նա ի գրի իւրում գիտալականն առաջադրեալ էր մեզ: Եւ ահա ընդ պատասխանւոյն մերոյ գրոյ նորին՝ և ընդ նմա առաքեցաք առ Վսեմութիւն նորա՝ զգրուածսն երկուց հեղինակաց. այսինքն է, զԽորենացւոյն և զայսմաւուրին՝ թարգմանեալ ի լատին, և զհայերէնն գրեալ ի միասին: Եւ մնացին երկուց հեղինակաց բանքն, այսինքն Բուզանդին և Ճառընտրին, որք հետեւաբար թարգմանին, և առաքեմք առ Վսեմութիւն նորա: Եւ թէպէտ հոգամք, որչափ հնար է, փութով աւարտել, սակայն և այնպէս փոքր մի յապաղի՝ յաղագս խրթին և երկարածիգ լինելոյ բանիցն: Արդ՝ ի թարգմանեալս յայտոսիկ ոյք ոյք բանք երևեսցին անստոյգք՝ զայնոսիկ ընդ մնացեալ հեղինակաց բանիցն բաղդատելով՝ ունի Վսեմութիւն նորա ենթադատել, և զստոյգսն որոշել, զի թարգմանիչքն անստգիւտ թարգմանելոյ աղագաւ՝ զինչ և որպէս գրեալ է, զայն այնպէս թարգմանեցին: Խորենացին չունի զամբողջ պատմութիւն վարուց սրբոյն յակոբայ, այլ այնչափ՝ որչափ գրեցաք: Գերյարգելի աբբայ հայր մեր բազմաւ սիրով զողջոյն մատուցանէ Վերապատուութեանդ: Եւ արդ՝ յանձն արարեալ զիս սրբազանից աղօթիցդ վերջ տամ բանից իմոց: Եւ մնամ

Վերա. քում

պատրաստական յամենայնի

հուաստ ծառայ Հ. Մ[ատթէոս] Վ.:

Յամի տեառն 1756
Յունիսի 5
ի Վէնէտիկ